

\id 1PE

\h 1 Petrus

\c 2

\s Nuik: Wali inim segu genang min-naku

\r 1 Petrus 2:1-3

\p

\v 1 Blong duo yap, Ki Wali Iram go blung! Ngganemot sogoso taybat so dabui lo duing go naklay, motnang ba sik sogo ngga sono se tega-sing!

Yangga:

- wamoy sogo takebali;
- lom-a tebadali babu go;
- nele sik so dabui piam go;
- **uwayang go**; ngge naklay nase tega-sing!

\p

\v 2-3 Yang! Woy Dem lo ngga suey dato, motnang tang so ngga mo tra. Ngga ey, duo kinsay kalik, unen go min-naku teguop sup genang-a, Senang Wali nebut sogo motnang se duding! (Ngga tang so, wali min seni-a kok go) susuoy go sikabung sesegu goso, motnang mea lemoy.

\s Nuik: Blong duo yap suing genang kutrui, Iram Yesus gabe

\r 1 Petrus 2:4-10

\p

\v 4 Se senong! Woy Dem wali demu dawin ey go gabe. Nemot-a, sikabung lo mo betep go, no, seni ey go tang so, Nemot seguong-a Ki Wali Iram lo mo kuoy gabe. Demu baya dawin ey go kalik, kutrui so Nemot mo sey. Yang! Woy Dem lo buong genang sogo-a, motnang se weng-lak!

\p

\v 5 Se senong!

- Ki Wali yap* klik genang demu blong ey go kalik, blong duo yap buong genang so se suing-lak!
- Nggano blong duo yap kon kua go, * **(Note: imam nogo nebut)** klay gono Ki Wali Iram nogo iway se pupu!
- Ngga ey, wali-tasam naklay, Ki Wali Iram go dabui no but go-a, taiti kalik se iti.
- Motnang lo iti genang ngga, Iram Yesus lo tap ngga taling golo, teguop so gemang mo lemoy.

\p

\v 6 Se duing! (Woy Dem wali demu dawin ey go seni gabe). Wali Sam Klaut ba no Nemot sogo ngge kalik mo pu-nengam:

\q <Demu nemu klaya seni, teguop go, Genam lo kuoy go, Sion yakena* (tempat Bait Allah) no mo tui! Nemot sono nando lo dabui iti go, dabui sadui mea kua tra.>

\p

\v 7 Yang! Motnang, Yesus no keng go sikabung nogo, demu ngga go seni kangok dega. No, kua keng go sikabung nogo, demu ngga, seni kua. Se duing!

\q <Yap so kiklik go sedue lo betep go demu ngganemot, kutrui dawin ey goso (Ki Wali Iram lo) mo sey gabe!

\p

\v 8 Wali Sam Klaut ba no mo klik dali:

\q <Sikabung go masi Demu ngge no tedak go, nemotnang ey mea pui. Nemotnang demu ngga temoy sono tegueng go iseng mea tra.>

\m Yang! Ki Wali nebut senang no kua tup go keng go tang so, nemotnang go wali tedak go piam ba no gemang kekenong. Nemotnang kua keng golo pui go ngga, Ki Wali Iram go duduing no mo lemoy.

\p

\v 9 No, ku klik go sik sogo wawi go pung go, blong teguop go ba no degut genang so, motnang-a Nemot lo mo pu.

- Ki Wali Iram lo kuoy go sikabung gabe;
- Ki Wali Iram go taiti-iway so iti go keball sedue Nemot go blung kon kua go gabe;
- Ki Wali Iram lo kuoy go uduo-nebo, Nemot go tasam-tasam kangok go pepen-klong genang sogo.

\v 10 Yang, banim nogo, motnang Ki Wali Iram go uduo-nebo kua. No, nggeasui go, Ki Wali Iram go blung so, motnang mo lemoy. Banim nogo, Ki Wali Iram go taiti-klum, motnang kua ikum go iti. No, nggeasui go, motnang Nemot go taiti-klum mo tra.

\s Nuik: Blong duo yap wali genang

\r 1 Petrus 2:11-17

\p

\v 11 Dem debui blong duo-yap! Kukunan ngge blo nogo, motnang sip kua go sikabung kalik gabe. Mang king go ngge, suey so se tup! Saysuk go duduing no, keda so motnang kua kekeng! Motnang go waglo-don, duduing piam golo nega genaning!

\v 12 Mang king meno: Yang! Woy Dem kua keng go sikabung nesip nogo, motnang go tasam suey so se! Nemot-a, nggeasui go motnang ‘sedue piam’ goso pu go, no, motnang go tasam suey so ikum go, sikabung lo mea pen: “Yang! Ngga seni so semu go lo; genam lo piam so pu go.” Ngga sik so, Ki Wali Iram go kisebui ku nogo iway, blo no nemotnang lo iti genang.

\p

\v 13 Mang king meno dali: Woy Dem tang sogo so, wengkabui-wengkabui nogo, motnang logo ta ey se kokong! Klaya seni, ngga kukunan blo ta so mlak go deguena dega: ‘Roma go Kaiser’.

\v 14 Nggano, Kaiser lo taling go gubelnul-gubelnul nogo, ta se kong dali. Gubelnul logo, sedue piam go nogo idekeba taling go, nggano, sikabung suey so pupluok go sui, blo sono pu go tasuey mea taling dali.

\v 15 Se senong! Ki Wali Iram lo duduing go: Kua senong go, puplu so pepen go sikabung, motnang go ta suey ikum go tang so, Ki Wali Iram nogo nebut wayang, tandali go mea kua pen.

\p

\v 16 Mang king meno: Sikabung ta mo itak go kalik, motnang se susuing. No, motnang ta mo itak go ngganemot tang so, wali tap taybat lo puem genang sogo so, kua gemang. No, Ki Wali Iram go keball sedue kalik, se pupluok.

\v 17 Mang king temu:

- Sikabung naklay se uwawi;
- anduasi blong duo yap nogo klum se tetaling dali;
- Ki Wali Iram sono suali se tetra;
- Roma go Kaiser nogo ta ey se kong!

\s Nuik: Iseng lek gono suing genang tap

\r 1 Petrus 2:18-25

\p

\v 18 Dem debui, koybutasemu!

- Motnang go wengkabui nogo ta suey so se kokong. Dabui suey go wengkabui seguong nogo-a kua. No, naglong-naglong sogo wengkabui nogo, ngga kalik dali se!

\v 19 Se duing! Tabat kua semu gono, Tabat kua semu gono, no, dabui iku lo Ki Wali Iram go duduing-a keng go, Ki Wali Iram go duduing-a keng go-tang so,

tebadali idekeba-a taling go, iseng ngga, gigling ey motnang se lelek. Gigling ey lek go ngga, Ki Wali Iram sik sogo taiti klum, motnang nogo gemang.

\v 20 Yang! Tabat piam go tang so, motnang no idekeba iti go, sogo temoy no dabui ta ya tegue? No, tasam suey go tang sogo so, gigling ey ide motnang lo lek go koklong go, yangga, Ki Wali Iram sik sogo taiti-pegas mot blo so gigit go!

\p

\v 21 Yang! Ide lek go koklong genang sogo so motnang Ki Wali Iram lo mo pu gabe. Seni so, Blong Dem tang go, iseng ngga kalik go mo tra. Ngga ey, motnang nogo yatrang suey go, Nemot lo mo taling. Nemot logo yatrang ngga dali no, motnang se kekeng.

\p

\v 22 Seni so, (Wali Sam Klaut ba no Nemot so klik go kalik):

- *Tasam piam go Nemot logo kua semu.*
- *Nemot go lom ba logo, nebut piam go ya kua tup, wamoy mlue kua dali. ”*

\v 23

- *Nemot so, kemla kuep go nogo, kemla way Nemot logo kua pu gabe.*
- *Idekeba nemot lo lek go nogo, nebut piam-a way so kua tenguo.*
- *Piam naklay nogo kisebui way, Ki Wali Iram, seni-a nemudi so tetaling go, ta ba sono, mo itak.*

\p

\v 24 Se duing!

- *Blong Dem tang go saysuk-a di no tegak go lo, imot logo kuklue naklay yam so mo tebuo gabe.*
- *Yang! Ngga tang sogo so, piam kuklue go don nogo imot mo kebong. Ngga ey, Ki Wali Iram lo duduing go kalik, seni-a nemudi so, imot mea wali.*
- *Seni so, Iram Yesus go kuo-bu logo tang so, motnang go sadui-sadui gabe mo saboy.*

\p

\v 25 Yang! Yesus ngga motnang yay so susuing go wengkabui gabe. Mot go waglo-don, Nemot lo suey so mea wegeng. Seni so:

- *Banim nogo, domba kalik, motnang tap mo nega. No, nggeasui go, Iram Yesus no, keng genang so, motnang mo teguey.*